

**Zeitschrift:** Schwyzerlüt : Zyschrif für üsi schwyzerische Mundarte

**Band:** 17 (1954-1955)

**Heft:** 1

**Rubrik:** Suecher und Düter

**Autor:** [s.n.]

#### **Nutzungsbedingungen**

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

#### **Conditions d'utilisation**

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

#### **Terms of use**

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 14.07.2025

**ETH-Bibliothek Zürich, E-Periodica, <https://www.e-periodica.ch>**

SUECHER  
UND  
DÜTER



## EM NE MUSIKER

(*Georg Aeby †*)

*Wie het er albe gsinnt und gspilt so schön,  
Und komponiert mit wahre, volle Zauberön.*

*Sys Wunderlied, chum het er's ghört im Ohr,  
Het er's scho dirigiert vor sym erträumte Chor.*

*Zerscht het er gluegt und gstimmt, und lysli gsummt,  
Und d Melody het tönt, dass alles isch verstummt.*

*Gar sittig het er ds Wärk em Änd zuegfüert,  
Es het e jede packt und töuf im Härze grüert.*

*Di vile Stimme si für ihn es Echo gsi  
Vo allem Schöne, Guete, gsetzt i d Melody,*

*E Melody, wo cho isch usre bessre Wält,  
Wo für ihn meh isch gsi als alle Ruehm und Gäld.*

*Urüejig sträbt sy Geist, gäng zwäg zum höche Flug.  
Er grüblet, suecht, niüd isch ihm schön, vollkomme gnueg.*

\* \* \*

*Doch ds Läbe het ihm früech vil Not und Chummer bracht,  
Und Chrankheit, Lide, Sorge, schwäri, schwarzi Nacht.*

*Jitz isch er ryf und frei, er ligt im Grab so still.  
Sy Seel, sys Härz singt witers, wenn's der Hergott will.*

## EM JOSEF BOVET

*Söll me dir es Dänkmal setze?  
Söll me stifte dir e Schuel?  
Wird me di au später schätze,  
Lehre vo der vom ne Stuel?*

*Wärt bisch du de Schwyzzer worde  
Dür dys Wirke, dür dy Chraft.  
Sig's im Süde, sig's im Norde  
Weiss me, wie du gäng besch gschafft.*

*D Stimm vom Volk besch du la töne,  
Jedes Wort isch dir es Lied.  
All di Melodie, schöne  
Sy dy Chunscht, won is erzieht.*

*Ds Beschte besch du wölle rette,  
Ufwärts treit het üs dy Geischt.  
Und vo dyne Noteblätter  
Strömt e Macht, wo Liebi heisst.*

*Gsprunge bisch mit lange Schritte  
Zu de Probe, Tag und Jahr.  
Zrüggħa het di gar keis Bitte, —  
Witer bisch im wysse Haar.*

*Und der Blick vo dynen Ouge  
Het üs töuf im Härze brönnt.  
Wärde mir au öppis touge,  
Oder isch üs d Kunscht vergönnt?*

*Gärn hätt mir gäng wölle singe  
Vor dyr wysse, fyne Hand.  
Jedem besch du's chönne bringe,  
Bald mit Gfüel, bald mit Verstand.*

*Glüchtet het dys Gsicht, Dy Stirne  
Vom ne innre heilige Füür.  
Glänzt het's vo dir wie vo Firne,  
Und der Kunscht besch zahlt dy Stüür.*

*Nie besch glüejet, gäng si Sorge  
Dir wie Steine gheit uf ds Gmüet.  
Töuf i d Nacht, ja bis zum Morge,  
Hesch du gschaffet, gsuecht und glüeit.*

*Spile, Singe, Dirigiere,  
Si e Teil vo dyre Kunscht.  
Schribe, Dichte, Komponiere,  
Sta bi dir i glicher Gunscht.*

*Gar vil lehren und verzelle —  
Hesch du chönne uf re Reis.  
Alles chunt us eire Quelle,  
Und di Vilfalt wird zum Eis,*

*Won is alles wott bewahre,  
Wo zum Glanz git March und Chärn.  
Lueg, vo wyt här chöme d Schare,  
Und e jede het di gärn.*

*Was du gisch, das chunt vo Härze,  
Was du machsch, isch rächt und guet.  
Alles Chline chasch verschmärze,  
D Seel vom Volk blüeit i dyr Huet.*

*D Liebi het verklärty dys Walte,  
D Liebi zu dym Volk und Land.  
Drum hesch du nie chönnen alte,  
D Liebi isch für di es Band,*

*Wo di füert uf allne Wäge,  
Wo dir baut e feschi Brügg  
Zu üs allne. — Dür dy Säge  
Strahlt sie jitz no uf üs zrügg.*

*Witer wird dy Musik klinge,  
Witer singe wird dys Härz.  
Dyni Melodie schwinge  
Dür üs düre himmelwärts.*

## DER ALT MEISCHTER

(*Michelangelo*)

*In alte Zyte het e grosse Meischter  
Di Schüeler glehrt mit Bispil, Wort und Rat:  
«Es nützt euch niüd, wenn ihr beschwöret d Geischter,  
E Künschtler zeigt sy Chraft i syre Tat.*

*Im Marmor si enthalte alli Forme,  
Wo vorchö i der Wält, i der Natur.  
Es Vorbild git's, wo ufwägt alli Norme,  
Im Steiblock wartet ds Urbild, di Figur.*

*Was ihr müesst ha si Muet und vil Idee  
Und Glauben an e nenji Meischterschaft.  
D Kunscht isch nid gäng e Gab vo guete Fee,  
Us eujem Härze muess euch wachse d Chraft.*

*Näht Hammer, Meissel, Stift und Brett und Zange,  
Es jedes Wärchzüg dient sym Sinn und Zwäck —  
Erweckt, was brach im Stei ligt, tot und gfange,  
Was zivil und irdisch isch, das häbet wägg.*

*Es Ideal, das müesst ihr herrlich gstanze,  
Indem ihr löst, was bindet ds Meischterwärk.  
Es het kei Sinn, e schöni Linie wölle zthalte,  
Wo glänzt und blitzt im Trugliecht vo de Pärk.*

*D Idee, sie ligt nid i de Linie, Falte,  
Sie strahlt im Usdruck, im ne innre Glanz.  
Und d Schönheit cha me mässe nid und spalte,  
Sie isch im Körper und erfüllt ne ganz.*

*Erlöst de Chärn; ds Wärtlose muess uf d Site,  
Befreit d Idee und wecket d Harmony.  
Und ds Kunschtwärk, wo so lang im Stei het glitte,  
Ersteit, gebore zum ne höchste Sy.*

*Es gspürt kei Schwäri, atmet, fahrt a läbe  
Und isch vo allne Site rein und schön.  
Und d Götter, won is d Läbesfäde wäbe,  
Sie stune, rate, sin is fasch chli höhn,*

*Will mir als Künschtler und diür grossi Tate  
I mängem glich si wien en alte Gott.  
Und d Mönsche, wo süsch gärn e chli missrate,  
Sie gspüre ds Grosse, won e Künschtler wott.*

*Sie tüen is ehre, rüehmen und verwöhne,  
Sie merke, mir gä meh als Gäld und Guet.  
Und wenn di andre chyche, chäre, stöhne,  
Mir opfere füre es Wärk Chraft, Seel und Bluet.» —*

*Di Jünger lose, sinne und wei danke, —  
Bald het e jede zu sym Schaffe Muet.  
Der Meischter hilft und lehrt, isch voll Gedanke,  
Es chan e jede wachsen i syr Huet.*

*Sie ga a ds Wärk, tüe sittig afa löse,  
Was dunkel isch und nid na ihrem Sinn.  
Und all di Zwyfel, Mächt, di finschtre, böse,  
Sie si verjagt, — im Stei isch Wahrheit drin.*

*Der Meischter gspürt: di Unerfahrne, Junge,  
Sie si im Geischt mit sym Geni verwandt.  
Sys Wärk isch grate, isch vollendet, glunge;  
Er het se gformet mit syr Meischterhand.*

## EM NE TESSINER KÜNSCHTLER

(Prof. Fiorenzo Abbondio, Bildhauer)

*Er suecht und grüblet, sinnt,  
Sy Wäg isch färn und wyt.  
Bis er e Lösung findet,  
Bruchts vil Geduld und Zyt.*

*Scharf isch sys Aug; der Blick  
Isch sträng, au lieb und klar,  
Wo ds Schöne gseht, erlickt  
Sit syne junge Jahr.*

*E Römernase — d Stirn  
Isch höch und gwölbt und breit.  
Me merkt, es isch es Hirn,  
Wo dänkt und überleit.*

*Sys Haar ish läng und fyn  
Und passt zur zarte Gstalt.  
Es git ihm grad der Schyn,  
Wo azieht und guet gfällt.*

*Er isch e Künschtler, ryf.  
Er wott nid Ruehm und Gäld.  
Was ihn zum Schaffe trybt,  
Isch d Schönheit uf der Wält.*

*Sys Ideal isch rein,  
Git ihm zum Schöpfe Chraft.  
Und glücklich si vereint  
Talent und Meischterschaft.*

*Was edel, schön und guet,  
Das isch sym Wäse rächt.  
Derfür gäb er sys Bluet,  
Isch Künschtler, nid e Cbnächt.*

*Sy Glaube, töuf und wahr,  
Durchglüeit ihn klar und hell.  
Er gſtaltet wunderbar,  
Was lüchtet i syr Seel.*

*Sy Schöpfergeischt gryft wyt,  
D Kunscht isch es strängs Gebot.  
Sys Härz het Längizyt,  
Suecht Rueh bim liebe Gott.*

*Dä seit ihm lieb und lys:  
«Schaff wyters na mym Wort,  
De findsch du ds Paradis  
Scho a dym Ärdeort.*

*I weiss, du diensch mer treu, —  
Dys Mäss isch doch nid voll.  
Sig gäng my Jünger, neu,  
E Künschtler, wien er soll.»*

## DER CHRÜTERPFARRER

(zum Adänke a Joh. Künzle, selig, em berüemte Chrüterpfarrer)

*Wer kennt fasch alli Chrüter  
I Bärg und Tal und Wald?  
Was isch das für ne Düter,  
Wo jung isch und doch alt?*

*Es isch e rächte Glehrte,  
Wo d Wisheit het im Härz.  
Er hasset di Verchehrte,  
Straft se mit Witz und Värs.*

*Mängs Jahr geit er wyt ume,  
Suecht Blueme, jung und zart.  
Und muess er öppé brumme,  
Me ghört 's nid wägem Bart.*

*Di Chranke chan er heile  
Nid dür e Wunderkur.  
Was er ne wott usteile,  
Isch guet scho vo Natur.*

*Vil Mittel lehrt er kenne  
Dür's Forsche Jahr für Jahr.  
Söll i Euch d Nämē nenne?  
Sie heisse Lapidar.*

*Di Lüt mit ihrne Bräschte  
Si gönnen ihm kei Rueh,  
Er git ne gäng vom Beschte  
und seit e Spruch derzue.*

*Di Chranke tüen ihm lose.  
Doch mängisch tüe si dummm.  
De blibt ne halt e Mose,  
Und öppis geit chli chrumm.*

*Der Pfarrer cha nid häxe,  
Het nid für alles Chraft.  
Doch rüeft er für sy Nächschte  
Zum Herr, wo alles schafft.*

*Ja, Gott cha Wunder schaffe  
Und heilen alls sofort,  
We d Mönsche sich ufraffe  
Und glauben a sys Wort.*

*Der Pfarrer isch sy Jünger,  
E Prieschter treu und guet.  
Und d Lüt, die wärde gsünger  
Und fromm i syr Obhuet.*

\* \* \*

*Nach schöne, gfreute Zyte  
Da böset's mit sym Schnuf.  
Lang het er müesse lyde —  
Er luegt zum Himmel uf.*

*Zletscht het er müesse stärbe —  
Wie chalt si syner Händ —  
Sys Wärk isch ta uf Ärde,  
Er het es seligs Änd.*

*Gott wird ihn zue sech rüefe  
Und stelle vor sys Gricht.  
Mit Ärnscht wird er ihn prüefe,  
Ihm luege scharf i ds Gsicht.*

*Er wird ihm druf verhündē  
Sys Urteil mild und grächt:  
«Vergä si dyner Sünde,  
Du bisch e fromme Chnächt!*

*Wer so wie du cha bätte  
Und stritte gäge ds Leid,  
Wer wott di andre rette,  
Isch ryf für d Seligkeit!»*

DER NICHTE VOM CHRÜTERPFARRER SELIG  
*(der Frau Profässer Christine Abbondio-Künzle)*

*Chranksi heile, rich und arm,  
 De wird's eim im Härz rächt warm.  
 All das muess e Pfarrer wüsse,  
 Süssch hätt er ja gar keis Gwüsse.*

*Chrüter sueche, fruech und spät,  
 Wärtvolls us em Gstrüpp und Gjät —  
 Chrut und Uchrut guet erkenne,  
 Und au gschickt bim Name nenne,*

*Liecht het das es Meitschi glehrt,  
 Wo bim Pfarrer het verchehrt.  
 Het me son en gschyden Unggle,  
 Muess me sy Verstand la funkle!*

*Briefe schriben und Rezäpt,  
 Jedi Stund het grosse Wärt.  
 We me wott de Mönsche hälfe,  
 Darf me sälber nümme gälte.*

*Eländ lindren und vil Not,  
 Mängem gä sys täglech Brot,  
 Suppe choche für di Arme,  
 We si brüele zum Erbarme,*

*Einisch hie und einisch det,  
 Hälfe, schaffe, frueh bis spät,  
 All das isch e Pflicht für d Nichte,  
 Wo sie gärn wott ga verrichte.*

*Drum hilft sie mit aller Chraft,  
 Putzt und chochet, wöscht und schafft.  
 Lueg, wie sie em Chrüterpfarrer  
 Macht der Schriber, Chnächt und Charrer!*

*Herjeh, 's chöme sövli Lüt.  
Mänge chopfet nid e Düt.  
Sie muess losen und erkläre,  
Webre, schimpfe und chli chäre,  
  
We der Unggle au däm hilft,  
Wo nid als e Heilge gilt.  
Sie muess grüesse, wache, hüete,  
Luege, ob di Hüehner brüete.*

*Jedes legt im Tag es Ei,  
Gackert, chunt der Pfarrer hei.  
Ja, sie bringt nen ihres Fueter  
Besser als em Chind e Mueter.*

*Aber d Freud a Hus und Vieh,  
Geit no einisch gli verbi,  
We me ghöre muess vo Gäschte,  
Wie sie lide a vil Bräschte.*

*Mänge holt e Chrütertee,  
D Nichte schynt ihm grad e Fee,  
Wo mit ihrne wysse Hände  
Jede Schmärz zur Freud cha wände.*

*Kennt sie ächt es Wunderbrut,  
Wo au hilft der arme Hut,  
Wo am Sunntig bi der Linde  
Nie e Ma het chönne finde?*

\* \* \*

*So isch's gange drissig Jahr.  
Gfunde het me ds Lapidar,  
Wo di Junge wie di Alte,  
Ghulfe het am Läbe z bhalte.*

*Hundert hei se all Tag bsuecht,  
Gforschet hei sie, gäng no gsuecht  
No na vilne andre Mittel,  
Wo d Lüt grettet hei vom Spittel.*

*Gmischlet bei sie mänge Saft,  
Wo em Mönsch git neu i Chraft.  
Hilft nid Tee, so hälfe Tropfe,  
Isch's es Wunder? Cha me's chopfe?*

*Nüd vo Wunder. Die Mixtur  
Isch e Gab us der Natur.  
Loset doch der Pfarrer brichte.  
Was er weiss, si wahri Gschichte:*

*«Heile cha sech jedes Tier,  
Warum sött vesärble mir?  
Gott, der Vatter, wott üs schänke  
Syni Hilf, we mir dra danke!*

*Göht i d Bärgen und i ds Tal,  
Chrüter git es überall.  
Eis, das dörft ihr nid vergässe,  
Mässig sid im Trinke, Ässe.*

*Gsundheit isch e Gottesgab,  
Glaubt me's nid so geit's bärgab.  
Ja, denn chan euch niemer hälfe,  
Jede muess sy Sünd entgälte.»*

\* \* \*

*So het lang der Pfarrer gehrt  
Und derbi sy Chraft ufzehrt.  
Zletscht, da chan er chum meh schnufe,  
Er wird grüeft zum grosse Hufe.*

*Hässig reckt na ihm der Tod —  
Er findet Troscht bim liebe Gott.  
Pflegt het ihn voll Sorg sy Nichte,  
Doch sie weiss, sie muess verzichte.*

*Jedes Läbe het es Änd.  
Au das Liecht isch bald usbrönnt.  
Doch der Tot darf rüejig schlafe,  
Lueg, sys Schiff isch scho im Hafe.*

*Wer sys Läbe, stark und treu,  
Gopfret het, darf ohni Reu  
Flügen ufe zu de Fromme,  
Wo ihm säge: «Sig willkomme!»*

*D Nichte isch jetz ganz ellei.  
Blibt re niüd als Grab und Stei?  
Nei, sie muess no witer läbe,  
Darf nid ganz am Jammer chläbe.*

*Nid erfüllt isch ihri Pflicht,  
Au we Härz und Chraft fasch bricht.  
Witers muess sie schaffe, sorge,  
Vilne hälfe scho am Morge.*

*Mit Verstand und guetem Härz  
Kämpft sie witers gäge Schmärz.  
Ihren Unggle wird se lobe,  
Sägne, höch vom Himmel obe.*

## EM ALBERT BÄCHTOLD

*I der Frömdi suechsch du d Heimat,  
I der Heimat bisch du frömd.*

*Nöcher chunt der bie fasch keine,  
Niemer weiss, was i dir brönnt.*

*Einsam geisch du dyner Wäge,  
Pilgersch dür di halbi Wält.  
Schnufe, lüeje chasch du sälte,  
Hesch keis Hus und sichers Gäld.*

*Frömd bisch du de Frömde worde,  
Frömd bisch du den eigne Lüt.  
Du geisch witors — still, verschlosse,  
Losisch uf es inners Gliüt.*

*I dir fahrt es a verzelle,  
Läbig, warm, e Wunderquell.  
Gschichte, Bricht i vilne Zunge;  
Alles wird dir liecht und hell.*

*Was für d Mönsche isch verschleiert,  
Gspürsch du mit dym Chindermüet.  
I dyr Seel isch alls enträtselt,  
Dir ghört ds Rych, wo drin ufblüejt.*

*Wien e küene, gsched Entdecker  
Ziehsch du uf di wyti Fahrt.  
Was du suechsch, sie neui Mönsche,  
Gstalte na dyr eignen Art.*

*Neui Wäse, neui Wälte,  
Wachsen us dym Dichtergeischt,  
Wie sie läbe, was sie dänke,  
Du bisch dä, wo alles weiss.*

*Alli Gärte si dir offe  
I däm färne Feeland.  
Und di schönschte Frücht und Blüete  
Fallen i dy Künschtlerhand.*

*Du chasch schöpfe, du chasch forme,  
Schaffen iüs e bessri Wält.*

*Mit dir möchti mir ga wandre;  
Du weisch guet, was jede quält.*

*I de Härze chasch du läse,  
Sträng und sicher isch dy Blick.  
Was di Arme, Chline lide,  
Formsch du zum ne Mönschegschick.*

*Du wosch jäte, du wosch rüte,  
Fürnäh, was guet und schlächt.  
Liecht und Schatte weisch du z düte,  
Und du glaubsch a ds ewig Rächt.*

*Bring im Läbe, arm a Güeter,  
Dür dy Geischt wirsch risegross.  
Und di Riche vo där Ärde  
Näbe dir si Chnächte bloss.*

*Dyner Wärk hei ewig Wärte,  
's bindt se weder Zyt no Ort.  
Himmelufe, zu de Stärne,  
Treisch du d Mönsche mit dym Wort.*

*Albert Bächtold. Dy guet Name  
Isch e jedem Schwyz er wärt.  
Stirbt dy Lyb, vergange d Jahre,  
Witers läbsch du i dym Wärk.*

*Und der Sprach vo dym Schaffhuse,  
Hesch du ds schönschte Dänkmal gsetzt.  
Äng si d Gränze, chli si d Mönsche,  
Allne diensch du treu bis zletscht.*

*Meh cha niemer vo dir höische.  
Was du schaffsch isch gross und guet.  
Drinne wäbt dys Härz, dys Läbe —  
Jede Dichter schribt mit Bluet.*

## ALBERT SCHWEITZER

(*Us syne Gedanke*)

*Söll dys Läbe wärtvoll si,  
Muesch a d Wahrheit gloube.  
Stand für sie gäng feschter y,  
Mänge möcht se roube.*

\*

*Wenn wird's besser uf der Wält?  
We mir ds Härz chöi ändre.  
's nützt keis Gsetz, kei Sack voll Gäld,  
Us de richschte Ländre.*

\*

*D Juget muess ha Ideal  
Und es luters Gwüsse.  
Opfert sie em Urgötz Baal,  
Chan üs niemer schütze.*

\*

*Rette chan is üse Geischt,  
We mir neus wei schaffe.  
Blibe mir im alte Gleis,  
Wärde mir zletscht Affe.*

\*

*Brueder si und Mönsch zum Mönsch,  
Isch di neui Losig.  
Wenn du Theorie kennsch,  
Isch d Wält no nid rosig.*

\*

*Arbeit isch es chöschtlichs Guet,  
Keini isch z verachte.  
Pack sen a mit Glaube, Muet,  
Gob es wott vernachte.*

\*

*D Mönsche hein es höchers Zil,  
Muesch di numen achte.  
Schänke wei sie, hälfe vil, —  
Darfsch se nid entmachte.*

\*

*Üsi Wält wird wider neu,  
We mir klar chöi dänke.  
We mir muetig, ohni Reu,  
Üse Geischt wei länke.*

\*

*Wer de frömde Völker hilft,  
Lehrt ersch afa diene.  
Wer het glaubt: «Der Wyss befiehlt!»  
Söll's chli abverdiene.*

\*

*Wer es Volk belehre wott,  
Söll ds Gsetz sälber läbe.  
Rede nume vom ne Gott,  
Isch im Grund vergäbe.*

\*

*Wer nid Chrischtus i sech treit,  
Wien es Liecht vo obe,  
Wer im Geischt nid ufersteit,  
Dä söll Gott nid lobe.*

